

Na osnovu člana 16. stav (1) Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj 7/10 i 3/23) i člana 33. stav (3) Zakona o dopunskim pravima branilaca i članova njihovih porodica ("Službene novine Zeničko-dobojskog kantona", broj: 15/24), na prijedlog Ministarstva za boračka pitanja, Vlada Zeničko-dobojskog kantona, na 63. sjednici, održanoj dana 27.12.2024. godine, d o n o s i

U R E D B U

O SUFINANSIRANJU SPORTSKIH AKTIVNOSTI RATNIH VOJNIH INVALIDA

DIO PRVI - OPĆE ODREDBE

Član 1.

(Predmet Uredbe)

Ovom Uredbom utvrđuju se uslovi, način i postupak za ostvarivanje sredstava u svrhu participacije troškova sportskih manifestacija i invalidskog sporta branilaca - ratnih vojnih invalida, koji imaju prebivalište na području Zeničko-dobojskog kantona (u daljnjem tekstu: Kanton), kao i povratnika u entitet Republiku Srpsku koji ostvaruju osnovna prava iz branilačko-invalidske zaštite u gradovima/općinama Kantona i koji su na evidenciji nadležnog organa za vojne evidencije u gradovima/općinama Kantona.

Član 2.

(Korisnici prava)

Korisnici sredstava mogu biti:

- a) ratni vojni invalidi – sportisti;
- b) invalidski sportski savezi i invalidski sportski klubovi, čiji sastav pretežno čine ratni vojni invalidi i
- c) kantonalna udruženja ratnih vojnih invalida za potrebe održavanja sportskih manifestacija.

Član 3.

(Sportske aktivnosti)

Sredstva mogu biti dodijeljena u svrhu sufinansiranja:

- a) učešća u sportskim takmičenjima i manifestacijama invalidskih sportskih klubova i pojedinaca u invalidskim sportovima;
- b) organizovanja sportsko-rekreacionih takmičenja i aktivnosti, te manifestacija u sportu i rekreaciji invalidnih lica;
- c) rada invalidskih sportskih saveza i asocijacija i
- d) rada sportskih organizacija koje okupljaju ratne vojne invalide.

Član 4.

(Namjena sredstava)

- (1) U skladu sa ovom Uredbom osiguravaju se sredstva kantonalnim udruženjima ratnih vojnih invalida za održavanje sportskih manifestacija.
- (2) Uredbom se osigurava i sufinansiranje:
 - a) takmičarskih aktivnosti invalidskih klubova u sjedećoj odbojci;

- b) Saveza za sport i rekreaciju Zeničko-dobojskog kantona, Saveza sjedeće odbojke Zeničko-dobojskog kantona i asocijacija košarke u kolicima i sjedeće odbojke Federacije Bosne i Hercegovine, odnosno Bosne i Hercegovine;
- c) takmičarskih aktivnosti košarkaških invalidskih klubova i reprezentativnih selekcija prilikom učešća na pozivnim turnirima u inostranstvu i
- d) takmičarskih aktivnosti invalida - sportista na međunarodnim takmičenjima i takmičenja u pojedinačnim sportovima na državnom, Federalnom i Kantonalnom nivou.

Član 5.

(Raspodjela sredstava)

- (1) Raspodjela sredstava vrši se prema programu utroška budžetskih sredstava Ministarstva za boračka pitanja Kantona (u daljnjem tekstu: Ministarstvo), kojeg za svaku godinu donosi Vlada Kantona, a na osnovu dostavljenih zahtjeva korisnika i njihovih godišnjih kalendara takmičenja, finansijskih programa, te konkretnih procjena u vezi:
 - a) značaja sportske manifestacije;
 - b) brojnosti članstva invalidskog kluba, saveza ili asocijacije;
 - c) ranga takmičenja i
 - d) ostvarenih sportskih rezultata reprezentativnih selekcija u invalidskim sportovima koje obuhvataju i članove iz Kantona, klubova i pojedinaca.
- (2) Opći i posebni uslovi, kriteriji na osnovu kojih se vrši dodjela sredstava, način odabira, praćenje provođenja i evaluacija rezultata utroška sredstava propisat će se pravilnikom koji donosi ministar Ministarstva u roku od 15 dana od stupanja na snagu ove Uredbe.

Član 6.

(Dokazivanje statusa)

U postupku ostvarivanja prava po ovoj Uredbi, korisnici prava svoj status dokazuju rješenjem nadležnog organa o priznavanju prava na ličnu invalidninu za ratnog vojnog invalida, odnosno izvršenoj registraciji udruženja, izdatim u skladu sa važećim federalnim propisima iz istih oblasti.

DIO DRUGI - POSTUPAK DODJELE NOVČANIH SREDSTAVA

Član 7.

(Podnošenje zahtjeva)

- (1) Zahtjevi gradskih/općinskih sportskih klubova i sportista pojedinaca za odobravanje sredstava, podnose se gradskoj/općinskoj službi nadležnoj za poslove branilačko-invalidske zaštite u gradu/općini u kojoj podnosilac zahtjeva ima sjedište/prebivalište (u daljnjem tekstu: gradska/općinska služba) odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove, koja je obavezna zahtjev obraditi i utvrditi prijedlog visine finansijske pomoći.
- (2) Zahtjevi sportskih saveza i asocijacija invalidskog sporta organizovanih na Kantonalnom i višem nivou, direktno se dostavljaju Ministarstvu.

Član 8.

(Sadržaj zahtjeva)

Zahtjev za finansijsku pomoć obavezno sadrži:

- a) naznaku grane sporta i ranga manifestacije odnosno takmičenja, sa vremenom i mjestom održavanja;

- b) poziv organizatora takmičenja (za takmičenja u inostranstvu);
- c) finansijski plan – troškovnik održavanja manifestacije odnosno takmičenja i visinu potrebnih sredstava pomoći;
- d) podatke o učesnicima odnosno takmičarima i pripadnosti kategoriji ratnih vojnih invalida, kao i stepen invalidnosti, ukoliko se radi o pojedinačnim - individualnim sportskim takmičenjima
- e) odluku odgovarajućeg organa o organizovanju manifestacije odnosno učešću na takmičenju.

Član 9.

(Postupak po zahtjevu)

- (1) Odluku o dodjeli sredstava u iznosu do 5.000,00 KM, utvrđenih Programom utroška sredstava, donosi ministar Ministarstva.
- (2) Na obrazloženi prijedlog ministra Ministarstva, zaključak o dodjeli sredstava za finansijsku pomoć u ostalim sportskim aktivnostima u iznosu preko 5.000,00 KM, donosi Vlada Kantona.
- (3) Isplata sredstava se vrši putem gradske/općinske službe, žiro računa udruženja, sportske organizacije ili pojedinca, kojima su sredstva odobrena.
- (4) Zahtjevi koji ne ispunjavaju uslove propisane ovom uredbom bit će odbijeni putem obavijesti koju donosi ministar Ministarstva.

Član 10.

(Dostava i pravdanje sredstava)

- (1) O doznačenim sredstvima za isplatu sredstava gradska/općinska služba obavještava korisnike i istim vrši isplatu putem tekućih računa.
- (2) Gradska/općinska služba je dužna Ministarstvu dostaviti pravdanje utrošenih sredstava u roku od 15 dana po izvršenoj isplati.
- (3) Korisnik sredstava (savez, klub, pojedinac) je dužan u roku od 15 dana od dana održavanja takmičenja dostaviti Ministarstvu pravdanje utroška odobrenih sredstava.

DIO TREĆI - ZAVRŠNE ODREDBE

Član 11.

(Sredstva za ostvarivanje prava)

Sredstva za realizaciju sportskih aktivnosti osiguravaju se u Budžetu Kantona u skladu sa prilivima sredstava.

Član 12.

(Evidencija)

Elektronsku evidenciju o podnesenim zahtjevima i korisnicima prava vode gradske/općinske službe i Ministarstvo, po obrascima koje propisuje ministar Ministarstva, u roku od sedam dana od dana stupanja na snagu ove Uredbe.

Član 13.

(Uputstva i instrukcije)

U realizaciji ove Uredbe, ministar Ministarstva može donijeti odgovarajuće instrukcije i uputstva.

Član 14.

(Ravnopravnost spolova)

Sve imenice koje se odnose na braniocima i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 15.

(Stavljanje Uredbe van snage)

Danom primjene ove Uredbe prestaje važiti Uredba o sufinansiranju sportskih aktivnosti ratnih vojnih invalida ("Službene novine Zeničko-dobojskog kantona", broj: 4/14).

Član 16.

(Stupanje na snagu i objavljivanje Uredbe)

Ova Uredba stupa na snagu osmog dana od dana objavljivanja u "Službenim novinama Zeničko-dobojskog kantona", a primjenjuje se od 01.01.2025. godine.

Broj: 02-02-21451/24

Datum, 27.12.2024. godine

Zenica

PREMIJER

Nezir Pivić

DOSTAVLJENO:

1x Ministarstvo za boračka pitanja,

1x "Službene novine Zeničko-dobojskog kantona",

1x a/a.